

Docih Gungcanjdangj

感谢共产党

□ Vangz Fungmingz Dangz Yengauh / 黄凤明 唐彦高

Mbwk:

Vadauz nding le vamaenj yo,
Bimoq neix youh riengz doxdaug;
Gyo' mbaiq gungcanjdangj lingjdauj,
Aen mauhgungzhoj gou ndaej duet.

Sai:

Seizcin daeuj daengz va hai angj,
Mwngz ndaej duetgungz gou angqyangz;
Gaenx guh cungj miz caezgya bang,
Ndawranz cang rim gim caeug ngaenz.

Mbwk:

Haeux ndaej lai gwn mbouj youheiq,
Caih beix bingzdingh leix simgei;
Raemx dienx goengloh caez doeng ndei,
Gizndei mwngz cungj ndaej miz faenh.

Sai:

Gou ndaej souh'ik lawz beij mwngz,

Ga gaeq fwed gaeq mwngz ndaej gwn;
Gouq gungz doenghyiengh mwngz ndaej swngz,
Saek caek raemx cwngh gou mbouj gien.

Mbwk:

Daegbeix souh'ik cang songzdaeuz,
Yozyau mienx cienx can gwn ndeu;
Yihliuz baujyiemj ndaej daengxheu,
Lajmbanj geujheux haeuj ranz moq.

Sai:

Nuengx gangj yienghneix cungj caensaed,
Nyinhcaen saed naemj gou rox raeuh;
Nangqdaengz ndwenngoenz beksingq raeuz,
Gizsaed vunz raeuz cungj ndaej ik.

Mbwk:

Va ndei hailangh mak doxdin,
Rumzcin fwnsaeq dah raemx cienj;
Lohsienq aendangj daeuj dazyinx,

Lwgminz ndaej gvaq ndwenngoenz ndei.

Sai:

Bouxcawj fouq le ranznden gungz,
Duj va gag dog cungj mbouj rang;
Bouxhoj goj ndaej bouxmiz bang,
Caez buet siujgangh baefoedfoed.

Caez eu:

Vunzlai sim gyaex gungcanjdangj,
Laebbaenz ngamqngamq ndaej bak bi;
Doxdax gaemfwngz conz fouqmiz,
Vunzlai docih gungcanjdangj.



Dahduzgoep

青蛙姑娘

□ Ouh Caijfangh comz hoiz



(ciep geiz 3472)

Ya' gveiz dongx gvaq dahsau le, youh byaij bae yawj gangraemx, raemx sawdikdik yawj ndaej raen hangx gang caez, cix mbouj raen duzgoep fouz youq najraemx yawj coh de, Ya' gveiz lumj gij hoenz mbouj youq ndang nei. Raen gij yiengh Ya' gveiz baenzneix, Dahcing nyaenx mbouj ndaej riu ok sing daeuj, naeuz: "Go' gveiz, duzgoep de gaenq mbin hwnj gwnzmbwn bae lo." "Duzgoep haenx geijlai ndei ha!" Ya' gveiz hojsik naeuz. "Gou…… gou couh mbouj ndei lwi?" Dahcing doq cam. Daxmeh Ya' gveiz muengz dap naeuz: "Ndei! Ndei! Dahcing cieq ndei! Ya' gveiz, vaiq baij daiz gwn caeuz!"

3 boux de caemh daiz gwn caeuz, hoeng gag miz simsae. Daxmeh gig ndiep Dahcing, mbouj- duenh nip byaek hawj de gwn. Ya' gveiz yawj coh doiq lwgda Dahcing, lumj youq gyawz raen gvaq, nanz mbouj nanz couh laeglemx liuq Dahcing mbat ndeu. Dahcing ngaemgyaeuj mbouj ok sing, baenz gaemz iq baenz gaemz iq gwn haeux, siengj baenzlawz gangj gij saeh bonifaenh hawj Ya' gveiz. Gwn caeuz gvaq le, daxmeh gaem fwngz Dahcing,

naeuz: "Dahsau ha, seizneix hwnz lo, mwngz couh caeug daxsimj ninz haemh ndeu, mbwnrongh caiq heuh Ya' gveiz soengq mwngz maranz, baenz lwi?" Dahcing naeuz: "Mbouj yungh lo, gou bae ndaw gangraemx ninz ba!"

Dahcing mbouj siujsim gangj laeuh bak lo. Ya' gveiz baez dingq, couh sikhaek siengj daengz lo. "Mwngz couhwdg duzgoep, dahsau duzgoep." Dahcing launyaenq dap naeuz: "Go' gveiz ya! Gou dwg dahlwg iq Lungzvuengz. Aenvih okseng seiz dwg ndang duzgoep, gou deng daxboh vut haeuj congh rin ndawbya bae, youh deng gungqsou aeu diuzsai daeuj lamh youq, din fwngz ietlangh mbouj ndaej. Gou deng gyaeng youq ndaw bya, caj dai ndwi lo. Caeklaiq ndaej sou song mehlwg gouq. Aencingz sou gou ciengxlwenx lumz mbouj ndaej, seizneix gou nyienh haq hawj Go' gveiz bauqdap sou."

Daxmeh angq naeuz: "Danghnaeuz mbouj yiemz de moegdoeg, ranz hoj, mwngz couh guh lwgbawx gou ba!" Dahcing gipmuengz baiq gyabuz.

Dahcing caeug Ya' gveiz baenzranz le, vunz daengx ranz doxndiep doxgyaez, saedceij gvaq ndaej diemzsubsub.

Miz bi ndeu, mbwn rengx dai. Ya' gveiz raen vunzmbanj bouxboux hojnanz yaek dai, seiqlengq deuziek, couh naeuz Dahcing: "Mwngz dwg dahlwg Lungzvuengz, doek raq fwraq he gouq vunzlai ndaej mbouj ndaej ha?" Dahcing naeuz: "Go' gveiz ha, gou baenzlawz mbouj siengj guh saehndei ne? Mbwn rengx baenzneix, gou lij gip gvaq mwngz. Cauh fwn couh famh gij diuzlaeh gwnzmbwn, yaek deng dai. Hoeng cijaeu gouq ndaej beksingq, gou dai hix dij lo, gou sawqsawq ba!" Haemhde de couh cang ndei,

diuq hwnj byonghmbwn bae heuh rumz yauj fwn. Yaepyet, fwjlaep humx mbwn, byaj mig byaj raez, fwraq couh doeksasa roengzdaeuj lo, raemxfwn ndaej rwed dumz naz reih, guenq rim diuzdah diuzmieng aendaemz aenfae bae.

Raemxfwn gouq lix lajbiengz fanhfaed, hoeng Yidi cix hozndat lo. De roengz lingh hawj Lungz- vuengz, heuh de youq 3 ngoenz ndawde gaemh Dahcing dauqdaeuj, yaek gaj de. Lungzvuengz cij ndaej baij lwgdaeuz Lungznding guh sienfung. Lungznding mbouj nyienh dahnuengx deng haih, couh laeglemx lwnh dahnuengx vaiq ndojdeuz.

Dahcing rox le, saemxsaeux saxsax buet haeuj ndawbya bae, ndoj haeuj aen congh rin bae.

Lungzvuengz ganj daengz dinbya Byagujlungz, gaemh mbouj ndaej Dahcing, hujdengdeng minghlingh gyoengq bing gwnzmbwn humx Byaguj- lungz, aen congh aen congh bae ra. Dahcing siengj ok aen banhfap ndeu, de youq benq congh rin luenhnyagnyag ndawde, mbouj dingz daj congh neix ndonj daengz congh haenx. Lungzvuengz cungj gaemh mbouj ndaej de, cijndaej baij lwgdaeuz Lungznding cap youq Byagujlungz, souj dwk Dahcing.

Daj seizneix hwnj, youq dinbya Byagujlungz, couh miz aen mboq ndeu mauh okdaeuj lo, gyoengqvunz heuh aen mboq neix guh "Daemz- lungznding". Liz Daemzlungznding mbouj gyaex, youq benq congh rin luenhnyagnyag ndawde, hix miz gij raemxmboq daj cien congh bak congh bauq okdaeuj, gyoengqvunz heuh de guh "Bak Ngeih Congh Mboqgoep", ciengxlwenx geiqnienh Dahcing.

(sat)